

共同經課 - 1

撒母耳記下十一章一節~十五節

1 年頭，列王出戰 ê 時，大衛差約押 kap 伊 ê 人臣，kap 以色列 ê 眾人，出去；in 就 thài 贏 A-bùn 人，圍攻 Láh-pa。大衛猶原 tiàm tī 耶路撒冷。2 有一日 beh 暗 ê 時，大衛 tùi 床裡起來，tī 王宮 ê 厝頂行來行去；tùi 厝頂看見一個婦人人 teh 洗浴；婦人人做真 súi。3 大衛為 tiòh hit-ê 婦人就差人去探聽；有人講，伊 kiám m̄ 是 Í-liân ê cha-bó-kiáⁿ，Hek 人烏利亞 ê bó，Poát-sī-pa mah？4 大衛差使者去 choā 伊來，伊就來到伊 hia，大衛 kap 伊同房；(婦人人清氣伊 ê 無清氣)；就 tò 去 in 厝。5 婦人人懷孕，差人 kā 大衛講，我已經懷孕。6 大衛差人到約押 hia，講，你差 Hek 人烏利亞來我 chia。約押就差烏利亞去見大衛。7 烏利亞已經來伊 hia，大衛問看約押好 mah？百姓好 mah？交戰好勢 mah？8 大衛 kā 烏利亞講，你落去 lín tau 洗腳。烏利亞出王宮了後，王就送一份食物 hō伊。9 總是烏利亞 kap 伊主人 ê 奴僕相 kap 暍 tī 王宮 ê 門口，無落去 in tau。10 有人 kā 大衛講，烏利亞無落去伊 ê 厝。大衛就問烏利亞講，你 kiám m̄ 是 tùi 遠路來 mah？啥事 m̄ 落去你 ê 家 ah？11 烏利亞對大衛講，約櫃 kap 以色列 kap 猶大 lóng tiàm tī 草寮 á；我 ê 主約押，kap 我 ê 主 ê 奴僕，lóng 紮營 tī 田野；我 kiám thang tò 去我 ê 家 lim 食，kap 我 ê bó相 kap 暍 mah？我 chí 你 ê 活，kap 你靈魂 ê 活來 chiù-choā，我決斷無 beh 行一個事。12 大衛 kā 烏利亞講，你今 á 日猶原 toà chia，明 á 載我 hō你去。烏利亞就 tī hit 日 kap 第二日 toà tī 耶路撒冷。13 大衛叫烏利亞來，伊就 tī 伊 ê 面前 lim 食；伊 hō伊醉；已經暗，烏利亞出去伊 ê 床裡暍，kap 伊 ê 主 chiah-ê 奴僕相 kap 做伴；也無落去 in tau。14 隔早起，大衛寫一張 phoe hō約押，託烏利亞 ê 手帶去。15 Phoe 內寫講，Tiòh 派烏利亞 tī 陣前極危急 ê 所在，lín 就對伊 ê 後面退來，hō伊受 phah 死。

共同經課 - 2

詩篇十四篇

1 大衛 ê 詩，交 hō 樂官。1) 戇人心內講，無有上帝。In thàn 邪惡，行可惡 ê 事；無一人行好。2 耶和華 tùi 天 à 落看世間人，Beh 看有明理 ê，有 chhē 求上帝 ê á 無。3 In lóng 歪 choah，一概變做污穢；無人行好，連一個亦無。4 做 pháiⁿ ê 人 kiám lóng boē 曉得 mah？In 吞食我 ê 百姓親像食餅，亦無求叫耶和華。5 In tī-hia 大大驚惶；因為上帝 tī 義人 ê 族類中。6 Lín hō sòng-hiong 人 ê 計謀變做見笑，總是耶和華做伊逃閃 ê 所在。7 願以色列 ê 拯救 tùi 錫安出！耶和華救伊受掠 ê 百姓 tò-tng 來，Hit 時雅各 beh 快樂，以色列 beh 歡喜。

共同經課 - 3

以弗所書三章十四節~二十一節

14 因為 án-ni，我跪落 tī 父 ê 面前，15 就是 tī 天頂地上 lóng 總 ê 家 tùi 伊來號名 ê，16 求伊照伊榮光 ê 富有，tùi 伊 ê 神，用權能 hō lín 心內勇健；17 hō 基督 tùi lín ê 信來 khiā 起 tī lín ê 心，hō lín 有釘根 hē 地基 tī 仁愛，18 chiah 能 kap lóng 總 ê 聖徒曉悟 hit-ê 長、闊、高、深，19 也知基督 ê 疼，就是 poāⁿ 過 tī 人所會知 ê 疼，hō lín 照上帝齊備 ê 充滿來得 tiòh 充滿。20 上帝會行做 poāⁿ 過 tī 咱一切所求所想 ê，就是照伊所運行 tī 咱 ê 權能，21 願 tī 教會 kap tī 基督耶穌榮光歸伊到萬世，代代無 soah。À-bēng。

共同經課 - 4

約翰福音六章一節~二十一節

1 Chiah-ê 事以後，耶穌過去加利利海 hit-pêng，就是 Thê-pì-lí-a 海。2 有 choē-choē 人 tè 伊，是因為看見伊所行 tī 病人 ê 神蹟。3 耶穌上山，kap 伊 ê 學生坐 tī hia。4 poāⁿ 過節，就是猶太人 ê 節，近 lah。5 耶穌 kiáh 目看見 choē-choē 人就近伊，就 kā 腓力講，咱 beh tùi tá-lòh 買餅來 hō chiah-ê 人食 ah？6 伊講 chit-ê 是 teh 試伊；因為伊家已知所 beh 行 ê。7 腓力應伊講，用兩百 ê 銀 á 來買餅，亦無夠額 hō in tàk 人得 tiòh 淡薄。8 伊 ê 學生中一人，就是西門彼得 ê 兄弟，安得烈，kā 伊講，9 Tī chia 一個 gín-ná 有五個大麥餅、兩尾魚；總是將 chiah-ê hō hiah choē 人，有夠 tá-lòh？10 耶穌講，Lín kah hiah-ê 人坐 teh。Hit 所在 choē-choē 草。人就 lóng 坐，數額約略五千。11 耶穌 thèh hiah-ê 餅；祝謝了後，就分 hō 坐 ê 人；魚亦是 án-ni，lóng 照 in 所 ài。12 In 已經食飽，耶穌 kā 伊 ê 學生講，拾所食 chhun ê 屑 á，免得有 phah-sng，13 就將所食 chhun 五個大麥餅 ê 餅碎，拾滿十二筐。14 Hiah-ê 人看見伊所行 ê 神蹟，就講，Chit-ê 真正是所 beh 來世間 ê 先知。15 耶穌知眾人 beh 來，ài 硬掠伊，hō伊做王，就 koh 退去入山，只有伊家已 tī hia。16 黃昏暗，伊 ê 學生落去海邊；17 上船，beh 過海去迦百農。已經暗，耶穌 iáu-bē 到。18 因為風真 thàu，海湧就 ná 大。19 Tùi án-ni 學生告船，約略行八里，á 十里，看見耶穌行海面，ná oá 近船，就驚。20 但是耶穌對 in 講，是我，免驚。21 學生就歡喜 chih 接伊上船；船 liám-piⁿ 到 in 所 beh 去 ê 所在。